

A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

ဝဏ္ဏ-ဗိဇ္ဇာ-ဝေဇာ ဣဝဇ္ဇာယုဒ

Vol. 62 || No. 05

June, 2026



Editor: Rev. Zamlianpau

Kumpuon

“Khrist a kipumkhatna” [Johan 17:22]

Khristian Tangkou

Vol. No. 62 || Issue No. 06 || June, 2026

A sung thu

Editorial Board

Editor	: Rev. Zamlianpau	- 7629978067
Joint Editor	: Rev. G. Mangmuanthang	- 9862118809
Cir. Manager	: Upa Jamsianmung	- 9862086615
	Nu Niangkhanmang	- 9863934719
Bus. Manager	: Nu Suanneiching	- 8787790520
	Nu H. Naomi Goulianching	- 8413854088
	Mr. S. Joel Lianmung Zou	- 8729906706
	Shie Laangkhanlal	- 9612502599
	Mr. Kapkhanthang	- 8119040460
	Shie Khaiboi	- 9362647470
Cont. Editors	: Rev. Awnkhanhup	- 9383114081
	Rev. Dr. Hangpi Manlun	- 9862910875
	Upa Suankhanmang	- 8730946698
	Upa Thangzasuan	
	Upa Khupsuankham	- 9863193371
	Upa Langkhanmang	- 8787726568

ZOU SYNOD ULIENTE

- **Moderator:**
Rev. Khamminlian
- **Moderator Elect:**
Rev. S. Ginlianmang
- **Secretary (Sr):**
Upa Khaiminlian
- **Secretary (Jr):**
Upa Jamgenthang
- **Treasurer:**
Upa S. Nangkhanlal
- **Statistician:**
Upa Hangsuanthang
- **Executive Secretaries:**
Rev. Zamlianpau
Rev. G. Mangmuanthang

- Editorial..... 01
- Thu tuomtuom & Thumpi ding 03
- Khrist a kipumkhatna 04
- Kinepna tha Jesu..... 06
- Presbyterianism 08
- PCI Khawmpi Report 14
- Suunna 18
- MWCA to ZPWF 20
- ZPWF Column 23
- ZPYF Column..... 24

If undelivered:
Please Return to:
The Editor
Khristian Tangkou, ZPCS Office,
Zomi Colony, Post Box-48,
Churachandpur, Manipur-795128

Copies - 1200

AMAN

Kumkhat ah	- Rs.	100
Post ah	- Rs.	200
Copy khat ah	- Rs.	10
Life Member Fee	- Rs.	1,000
Patron Member Fee	- Rs.	2,000
Memorial gift	- Rs.	2,000

Thusuo zousie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



NUOMMAN

1 Korinth 9:24-27

Kitaidemna ah kidemte zousie atai ua, hinanleh mi khat maimai in kipahman amu hi, chi na thei sih uh amah? Tua kipahman namu theina dingun tai un. Mi koipou kipahman sang dinga kidemna a pang mite sil zousie ah ama leh ama akithunun uhi. Amauten guolzawna lukhu sethei sang ding in apang ua, eite pen in asetheilou guolzawna lukhu sang dingin ipang uhi. Tuaziehin kei pen tupna neilou a tai ka hisih a, mi toh ka kisuh chiengin aguohtangpi su ka hisih hi. Hinanleh ka tahsa ka thunun a, ka thuzawna nuoi ah ka koi hi tuachilou in pen midangte kunga khantanhoi ka gen nuain keima nasan chingzoulou in ka umkha ding hi.

I Khristian hinkhuo khu Sawltah Paul in Kitaidemna/Kidemna khat toh ana tekah hi. Tu ha FIFA saina nei ah World Cup kipanta ding ahina ah tami toh kituoh in i Khristian hinkhuo entup lei chi dei huoi i sa uhi.

Sawltah Paul in Kitaidemna ah kidemte zousie a tai ua, hinanleh mi khat maimai in kipahman a mu hi ana chi hi. Tualeh kipahman mu theina ding in sep ding, bawl ding, zui ding tampi um chi zong ahing na gelsah hi.

I gensa ma bang un sawtlou in FIFA saina in World Cup hing um ding a, Football a Leitung pumpi kidemna thupitah hing um ding hi. Tam kidemna ah zui ding dan-le-dun tampi a um ding a, a zuiloute, Yellow Card, Red Card mu pawl a hing um ding a, lawchinna kipahman la utten dan dungzui a kidemna a, a kimawl uh a ngai ding hi. Leitung pumpi ah

Football siem tampi hing kidem ding ua, tuaah, First Cup mai hilou in kimawl mite a ding in nuomman lah thei tampi a hing um ding hi.

Tualeh, tam World Cup mai hilou kimawl na zousie in kimawl ding dan leh zui ding dan a nei chit chiet uhi. Sawltah Paul in ei Khristian te khu kimawl mi toh a hiing na tekah a, tualeh Lai Siengthou i et chieng un Nuomman tuomtuom a na gen hi.

- Philippi 3:14: Kipahman sang dingin Pasian in vanlam hatnain Khrist ah kei ahing han a, tua kipahman mu tumin phahtawpna mun ka del a hi.
- 2 Timothy 4:7-8: Ken kidouna hoi ka douta a, kitaidemna ka zouta hi, ginna ka kemta hi. Tuin dihtatna mang lukhu kei a dingin koi in a umta, tua khu Mangpa vaihawmpa dihtah in tua ni chiengin kei ahing pe ding hi, tualeh kei kung guoh ah hilouin, Ama hing kilahna ngaina poumate kungah zong ape ding hi.
- Jakob 1:12: Ze etna thuoh teitei mi khu ahampha hi, aziehpén etkhieh a aum zou chiengin Mangpa'n Ama itte kunga pieh dinga achiemsa hinna manglukhu asang ding hi.
- 1 Korinth 9:24-25: Kitaidemna ah kidemte zousie atai ua, hinanleh mi khat maimai in kipahman amu hi, chi na thei sih uh amah? Tua kipahman namu theina dingun tai un. Mi koipou kipahman sang dinga kidemna a pang mite sil zousie ah ama leh ama akithunun uhi. Amauten guolzawna lukhu sethei sang ding in apang ua, eite pen in asetheilou guolzawna lukhu sang dingin ipang uhi.
- Kihilna 22:12: Ngai in, hing pei pai ding ka hi, tualeh michin anasep dungzui a pieh ding ka nuomman ka kungah a um hi.

Manglukhu chi nga te:

Thuhun Tha ah manglukhu chi nga ana gen a tuate khu:

1. **2 Timothy 4:8: Dihtatna manglukhu:** Jesu Khrist hing pei kia gin-um tah ngahte tan ding.
2. **1 Korinth 9:25: A setheilou guolzawna manglukhu:** Ama kithunun a Mangpa a ding a kisusiengthoute tan ding.
3. **1 Thessalonika 2:19: Kipahna manglukhu:** Mangpa a ding a theipitu det hi a, midangte Khrist a puilutte tan ding

4. **Jakob 1:12: Hinna manglukhu:** Khristian zieh a gim genthei thuohthe tan ding.
5. **1 Peter 5:4: Atul theilou thupina manglukhu:** Hattuum lamkai gin-umte leh Belampute a ding.

Kimawl na leh kidemna a hing um chieng in a kimawlloute zong maimailou in theitawp in panpi khat chiet nei in khenkhat sum kita bang, ana kimuda zou bang zong a um thei hi.

Sawltah Paul gen bang in tambang a, a se thei leitung nuomman sang dingte bawn a sangkhalou ding entu maimaite nasan hichia i pan leh bang ding a, a se theilou manglukhu sang ding thanuom theilou i hi uoi chi ki-et phat huoi sah in um hi. Ei gingtute khu Vangam kai maimai ding zong hilou in kipahman san ding nei i hi dan Lai Siengthou ah chien tah in i mu uhi.

Tualeh, tam kimawl miten nuomman a lah theina ding un kipumkhat tah a a kimawl uh a ngai hi. Kipumkhatlou in khat in a ut dandan in, a tuohna lamlam ah mawh peehta leh bangchin nuomman la thei ding khop in guolzawna a sang thei ding uoi. A kipiehtuo dan uh i et leh michin in ama panmun chiet a thazaw a ngai hi. Goal Keeper in a goal ngaisahlou in a lang lamte goal ah khum ding in pan la mawh henlen, ahilouleh Centre a tai pan a panmun lungkimlou in goal vive mitsuon mawh leh kimawl na a pei theisih ding a, a guolzou ngaingai sih ding uhi.

Tuama bang in Hattuum sung ah i mawpuohna chiet ngai poimaw a, i sep thei chiet sep a lungkimtah a kipumkhat a poimaw mama hi. Mihingte khu lungkimna nei theilou i hi ua, Lasiemte i mu leh Lasiem ki-ut, Kimawl siemte i mu leh kimawl siem ki-ut, Thugen siemte i mu leh thugen siem ki-ut zel. Eima tan tawh a lungkim a poimaw mama hi. Lai Siengthou ah zong silpieh tuom chiet nei i hi dan a na gen a, Lamkai ding, Thugen ding, Lasa ding, Thum ding leh a tuomtuom a poimaw hi. Mi zousie laa siem leh a ngaikhe ding umsih van, mi zousie Lamkai hitheilou a, mipi zog a um ngai hi.

Tuazieh in Khrist nua i zuina ah tu kum i Humpuon bang un “Khrist a kipumkhat” a um a poimaw mama hi. I sep thei chiet i sep uleh a hing kigawm chieng in Hattuum i hat thei ding uhi.

Thu tuomtuom leh Thumpi dingte



1. Pasian lungsietna leh mapuina toh May ha ah i lut tou kiata ua, tu-le-tu in Half Yearly Audit pei laitah ahi hi. Tu May ha sung ah Missionary Day May 7, 2026 leh ZPWF Day May 10, 2026 ban ah Pentecost Day hun zang ihina uah Khrist toh kipumkhat a um ding in i hindan leh gamtat nei thei ding in Pasian kung ah kipumpieh tha in Hagau Siengthou tan chiet sawm va ui.
2. 22 Vei Synod Vaihawmna Khawmpi phasah bang in tu kum Evangelist khat leh Hamsapara a ding Headmaster leh Assistant Teacher lahna um hi. Tam Semtu kilate in Pasian dei bang leh hangsantah a a hing sep ua, Manggam i kehlet theina ding un Missionaries, Evangelists, Pastors leh Office Staff te tengteng a ding in thumpi va ui.
3. I Mangpa Jesu thugen tangtung zel in gam leh gam, nam leh nam kidou in thuthang damlang tuomtuom a hing um a gingtute i umna chiet ua gin-um tah a Mangpa a ding a um chiet ding in thumna toh pang chiet va ui.
4. Pasian lungsietna leh mikiphalte zal in Missionary Field a Biehinn lamna ding a sum tuoh kibelap zel a, Mission & Evangelism Committee thuphasah bang in Biehinn lamna kipanta a, lam zaw ahi a, i Mission Field ua gingtaten Pasian a bieh ding bang tah ua a bieh theina ding un i thumna uah laan chiet va ui.
5. PCI Khawmpi toh kituo PCI kum 100 chinna Centenary lopna Phudmuri Presbyterian Church, Shillong ah nei ahia,ei Synod apat in zong a mang ding a kiguotten vamang thei in tamtah in a hing tungta ua, tam Khawmpi lawching mama chi thu i zah zieh un Pasian lung ah ahing puinate zieh in lungdam thu gen va ui.
6. Ahing tung ding 11th June 2026 (Thursday) chieng in a 12veina ZPWF Thukhawmna Presbyterian Church of India, Lailam Veng a um ding ahia, telchiet ding in Pasian min in i kichiel uhi

PRESBYTERIANISM

(Presbyterian Hattuum Peidan)

Sutzopna

-Rev.Khupsianlal, Gunpang Biel

3. PRESBYTERY: PCI Danpi in agen bangin Prebytery siem ahiding leh Pastor Biel thum sanga tawmzawlou aum angai hi. Kum chin Presbytery khawmpi nei ahi a, khawmpi membrete khu Ministerte, Pro.Pastorte, Upate, Lamkaite, Presbytery Committee tuomtuom a membrete, Biel Chairman leh Secretaryte, danzoukim ai awh Biel in aguotte, Presbytery guot banga Numei leh Khanglai ai awhite ahi uhi. Presbytery sepdingte khu Biel thulut ngaituote, Hattuum din, zopkhawm, loplut leh suhbeite, Upa tel, namdet, thunun leh tawpsahte, Synod palai tel, Committee member guot leh tel te, ahuop sunga Hattuum peiding dan saifel, Bieh in lam leh phelding phalna pieh, Hattuum gam leh inn sunga Synod ai awh a thuneitu hinate ahi. Presbytery khu Presbyterian min pawtu leh azepli kengtu ahi hi.

4. PASTOR BIAL (DISTRICT/ PASTORATE): PCI Danpi in agen bangin Hattuum ni ahiei, asang a tamzaw ahiei kigawmkhawm khu Biel in asiem thei ahi. Biel siem leh saifel khu Presbytery ahiei, Synod thuneina ahi. Kum khat sungin khawmpi khatvei nei ahizel hi. Biel khawmpi membrete khu Ministerte, Pro.Pastorte, Upate, Biel Lamkaite, Biel Committee tuomtuom a membrete, Presbytery in a bikhieh banga Hattuum chin in aguot palaite ahi uhi. Bial Khawmpi khun ahuop sunga Hattuum silbawlte etkaipieh in ave a, ahing thututte uh angaituo a, Anntangham leh silpieh tuomtuomte amu in a enkol a, Tuolsung apat a Synod sum hing lutte khu mu in, Synod Office ah

asung lut a, Hattuum chin Pulpit nasepna humbit in, zah dih ahinai chi enkaitu ahi. Asai fel phahlou thute khu Presbytery ah atut zel hi.

5. TUOLSUNG HATTUOM: Tualsung Hattuum khu vaihawmna nuoinung pen hinanleh, Presbytery Hattuum hatna bulpipen khat ahi hi. Tuolsung Hattuum akhun member chithum a um hi: 1. Danzoukim member, 2. Baptisma tang dan zoukimlou member, tualeh 3. Member dinga amin giellut baptisma tangnailou te a um uhi. Naupangte kum 14 ahiei, atunglamte dan zawkim sah khu Hattuumte sep ding ahi. Dan zoukimlou koima Hattuum sil ah tanvou poimaw semding a zah

ding ahi sih a, Hattuum Committee member ding ahiei, leh khawmpi palai ding ahiei te akhun zah ding ahi sih uhi.

***Hattuum Committee:** Hattuum Committee khu Tuolsung Hattuum enkoltu lamkaite ahi ua, apoimaw mama hi. Local Church Committee (LCC) Member te khu Minister te, Pro.Pastorte, Upate leh akuldan leh Biel lemsah banga kum thum pang ding a telkhiet member (Tual Upa/Local Upa/Namdetlou memberte) ahuom hi. Upate panpitu ding memberte telbe a umte khu Mizoram Synod ten ‘Tual Upa’ chi ua, tuakhu Local Upa china ahi. Hattuum Committee mawpuohna khu Hattuum etkol leh a vaihawmna kalsuonpite, Danpi bang zel a thununna piehte, Bieh Inn leh a neitah leh Hattuum silnei dangte etkolnate, silpieh lahkawm, kepbit leh zahmate, Hattuum kikhopna zousie guottup, Hattuum min gielna bu hoitah a keptupte, minute bu, record leh file poimaw kephoi leh silpoimaw zousie genkhawm leh ngaituote ahi hi. A saipha lou thu te khu Biel ah atut zel hi. Hattuum Committee a Lamkai (Office Bearer) te khu Chairman, Vice Chairman, Secretary, Assistant/Joint Secretary, Treasurer, Finance Secretary te ahi uhi. Committee Lamkaite kum chin a guot tha khu bawldan ahi tangpi

hi. Tuabanga bawl khu lemtanglou ahitahleh zong, hina banga um sawtlou dinga kihenkuol zel ding dan ngaituo ahoi hi.

Chairman: Dan bu khun, “Bialtu Pastor koijong ama Bial sung a Tualsung Hattuum khat pou a hun azah chieng in biehnna kikhopna te leh committee meeting te ah puitu hina ala ding hi,” achi hi. ‘A um lemtang leh Hattuum Commmittee nate leh Hattuum kikhopna te ah thugending ahilou nah leh Chair aluo ding hi,’ chi in Mizoram Synod khun pei pi uhi. Hinanleh ZPCS in kizui thei nailou hi.

Secretary: Secretaryte khu Hattuum Official lai attna nna saipi pen ahi a, apoimaw mama uhi. Ahun tah a Committee hatte, Committee vaihawmna bozui leh, Hattuum kikhopna thuphuonte, lai mu leh thotkhietle leh sil poimaw dang tampi ah mawpotu ahi hi. Hattuum kikhop a thuphuon khu hoitah a lemtuoh in, tomkim leh kichientah a phuonkhiet ahoi hi.

Agenda siem: Khawmpi leh Committee te thu ngaituo ding (agenda) khu Secretary-ten angaituo zel uhi. Tuolsung akhun Hattuum member zousie’n agenda apekhawm thei uhi. Khawmpi leh Committee vaihawmna hoitah a apeithe na dingin Secretary ten agenda leptuoh leh theichien angai ahi.

Finance Secretary leh Treasurer:- Amaute khun sum kepdan hoitah a zui in sum akeping uh ahi. Hattuum mite Pasian Gam a dinga tuohkhawmte enkoltu ahi ua, dihtah leh ginum tah a akep silpoimaw ahi. Hattuum Committee in zahna ding angaituo bang zel in azang zel ding ahi. Hattuum Committee khu hachin hunbih nei in toukhawm ahi zel ahi.

Committee Meeting: Committee Meeting khu Bieh inn Vestry (Pindan room) ah ahiei, Committee room ahiei te ah nei ahizel hi. Tuabang neiloute khun Bieh inn ah committee nei hileh ahoi hi. Pastor Quarters leh inn dangte akhun committee bawl ahi ngaisih hi. Hattuum Committee khun Hattuum member zousie ngaisah a, suhhat leh siempiching dinga enkoltu ahi a, apoimaw mama hi. Vaihawmna hoi aumthei na dingin member te kilungtuohnate, kimuonngamna bouruok siemte, memberpite ngaituona theisiem piehte, Committee vaihawmna dettah a dinpi ngamnate, thuguh kepbit siem apoimaw hi. Committee member te lah a aguh a kilemlouna aum leh mipi te lah ah sil hoiloutah aneithe i a, akilung tuoh u'leh sephhawmna hoi leh kipumkhatna atun thei zel ahi. Hattuum Committee member te'n 'Upa biel biih' nei khu Hattuum humbitna dingte, genthei

leh hamsatna thuoh te ngaisahnate, ginna dihlou leh pawl dang biehnah lah apat Hattuum mite venbit nate in aphattuum mama a, innkuon leh mimal khuolchilna ah nasepna vanzah poimaw tah ahi kia hi.

HATTUOM VAIHAWMNA PEIPIDAN TANGPI:

Presbyterian Hattuum khu vaihawmna sawng kithuop tou dungjui a vaikihawm bang a peipi ahi hi. PCI sungah vaihawmna dan nga - General Assembly, Synod, Presbytery, Bial leh Tuolsung hattuum tuomtuom enkol dingin anuoi ah Committee khu bangza ahiei anei hi. Presbyterian Hattuum khun khawmpi leh committee vaihawmnate khu ingai poimaw mama uh ahi.

Khawmpi leh Committee lamkaite: Hattuum vaihawmna sawng akhun lamkai minpuohdan tuom tuom um zel hi: Tuolsung Committee leh Biel ah 'Chairman,' chi ahi a, Presbytery, Synod leh General Assembly te akhun 'Moderator' chi ahi. Khawmpi kikal a thu poimaw genfel dingin Biel leh Presbytery in 'Standing Committee' anei a, Synod leh General Assembly khun 'Executive Committee' anei kia ahi. Tuabang kal a thukin ngaituo dingin Mizoram Synod khun Officers' Meeting anei a, General Assembly-in Working Committee

aneih ahi. Tuolsung, Biel, Presbytery leh Synod te-ah Chairman leh Moderator-te pan hun sung khu kum khat ahi a, General Assembly Moderator term vang khu kum ni ahi hi. Mizoram akhun kum 1988 Synod Khawmpi apat in Moderator khun kum khat sung hun pumpi in asem ahi. Tuolsung apat a Synod tan in Khawmpi leh Committee a mawpuohna tuomtuom te khu Minister leh U pate'n, term nei in sem uhi. Chairman leh Moderator te khun vaihawmna hoi aum theina dingin khawmpi leh committee te akaihuoi ua, mi hatzawte ngaidan lamai lou in, member tamzawte ngaidan angaikhe zel hi. Mahni ngaidan leh deidan sulang a mamberte puisawm dinga ngaituo ahisih a, mahni in thupuasah siem theina zong aneisih a, apoimaw lou akhun vote ape ngai sih uhi. Chairman leh Secretary-te khun vaihawmna ah thu genkhawmte bawzuite akhun mawpuohna aneih ahi.

Vaihawmna ah member zousie apoimaw uhi. Vaihawmna akhun mamberten zalén tah in ngaidan agenthei ua, vote kibang chiet in aneih uhi. Vaihawmna angai poimaw ua, angaisah a, abawl maimai ngai sih ahi. Khawmpi a genkhawmna ah kilungtuohna aumlou leh vote la-in a tam zaw (majority) dei dan ah thupuasah

ahih zel a, tuakhu atawm zawlam inzong lungdam tah in apom siem mai zel ahi. Committee-akhun vote lalou in lung kituhtah a thupuhna bawl hizel hi. Tambang a vaihawmkhawmna leh thupuasah siem zel ahizieh in member chinte mawpuohna asang mama ahi. Thu hamsa te khu atamzawte deidan thupuasah siem mai lou in, hun dangah ngaituo kia dingin aki koi zel hi. Policy khoi thutha, thupuana siem ngal lemchang lou zong thu tha ngaituo kia ding (notice of motion) banga koi ahi zel ahi.

Thuneihna kingaih poimaw tuana/ Kizatattuona khu Presbyterian Hattuum peidan poimaw tah ahi. Kalsuondan feltah (proper channel) a silbawl angai poimaw ahi. Ngaituo tou zel ding thu umte khu vaihawmna nuoinung zaw apat in atung a vaihawmna sawng ah atuttou zel hi. Sil poimaw bih ahilou leh vaihawmna khat Kansan in asang a sangzaw ah thu peisuoh sah ahi ngaisih ahi. Gente na'n, Biel in Prebytery Kansan in Synod Executice Committee leh Synod ah thu thelut lou in, Presbytery tawn in athelut ding ahi hi. Anuoinung pen (tuolsung) apat a asangpen (General Assembly) tan in mawpuohna feltah nei in akizopsuoh a, abang pen hitaleh mahni in ading theisih a, akipoimaw tuo chiet uh ahi. Tuaziehin thuneina

akizatat sah tuo ua poimaw chiet ahidan uh kithei uhi. Vaihawmna sangzaw hinanleh , anuoi a te'n ahoiding geln a ahithe bangchiet ua asaite u'khu bangmalou in asuhbei pieh ngai sih a, poimaw ahileh ngaituo kia dingin akihil zaw uhi. Mimal inzong khawmpi leh committe thusuote khu angai poimaw a, zui ngei dingin angaituo ahi. Sil hoilou banga atheite khu ngaituo tha kia dingin Tuolsung Hattuum Committee ah atat zel ahi. Khawmpi leh committee thusuoh doudal leh zui utlou khu Presbyterian Hattuum peidan toh kikal ahi.

Hattuum sung a Fellowshipte (Numei pawlte, Khanglai pawlte) leh nasepna bameng tuomtuom a Committee te khu Hattuum leh khawmpi lamkaite'n ngaiven a theipi ding silpoimaw ahi. Tuachi'n, Presbyterian Hattuum khu mimal in ahiei, vaihawmtu thunei tuom bih te'n ahiei vai ahawm na uh ahisih a, mizousie'n pangkhawm a mawpuohkhawmna (collective responsibility) leh lamkai hina puohkhawmna (collective leadership) ahi pen ahi. Lamkai dinmun tuding a guotte leh mawpuohna bih neitu dinga guotte inzong mahni tanvou chiet angai poimaw ua, sepsuoh ngei atop zel uhi. Mimal hoina leh siemnate aphattuum in

apoimaw ahi chi athei ua, Hattuum masawmna dih leh pichinna vang khu pankhawmsiemna apat umthei ahibou hi chi amanghil ngaisih ahi. Tua khu kepbit atop hamham zel ahi.

PEIDAN POIMAW DANGTE:

Presbyterian Hattuum khun Pasian khat ah Mihing thum, Pa leh Tapa leh Hagau Siengthou gingta Hattuum ahi. Bible, Thuhun Lui leh Thuhun Tha angai poimaw mama a, Pasian Thu, “ginna leh silbawl teena dihlou theilou” ahi achi hi. Hindan leh silbawl na zousie ah Pasian Thu, Bible zilsahna toh akituoh ei chi khu teena in azang ahi. Bible thu ah kibulphu in ‘Thugin Phuonkhietna’ (Confession of Faith) feltah anei a, ‘Huopzou thugin’ kichi, Apostol Thugin te, Nicea Thugin te, Westminster thugin te apawm ahi. Sakramen/Thuhun ni- Baptisma leh Mangpa Nitah Ann te khu angai poimaw mama hi. Hundamna tungtengah khun Jesu Khrist gintat zieh a hundam ihi uh chi ipom uhi. Presbyterian Hattuum khun mipi'n Pasian biekhawm angai poimaw in a uongbawl a, bie kikhop peipi dan zong akibang tangpi ahi. Pasian thu ngaikhiet leh phuonkhiet (thugen) angai poimaw ua, thugen vang khu mun lailung pen ah ki koi hi. Gam danga kibawl dan bangin Pastor te'n thu ahil tuom bih sih ua, Upate leh

Committee guot mi dangte inzong ahi. Kikhopna siem leh tanvou neitute guot leh apoimaw banga suhlandang khu Hattuum Committee khut ah aum ahi.

Hattuum peidan sil poimaw tah khat khu thununna (Discipline) ahi. Danpi khun thununna zahdan mumal tah asiem hi. Hattuum kipuihuoina bawsiet dan zilin hattuum tanvou poimaw apat a khawlsah dante, nawsuo dante, lamkaite khawlsah dante tanpha in aum ahi. Khumte khu pilvang tah in, hattuum mipi hoithe na ding pen a ngaituo kawm in Hattuum Committe khun apeipi zel hi. Thununna khu Hattuum suhsienghou nading leh dan bawtsete panpi nading a peipi ahi. Sum leh pai etkol: Sum leh pai etkol khu Hattuum vaihawmna ah poimaw tah khat ahi a, tuolsung apat a Synod tanpha in Hattuum mipi tampen piekhawmna ahi hiel ding hi. Hattuum innkuon chin pankhawm dan ding guonggal sah te, thawlawm lahkawm dingdan te, sim fel leh kephoi ding dan te, azah ding dan leh apeina ding mun dangdang guonggal dan khu Hattuum Committee te, Biel Standing Committe te, Presbytery Sub-Finance Committee, Synod Finance Committee leh Synod Executive Committee khut ah aum ahi. Pilvang leh nguntah a sum

etkolna ah pan lah tha zel apoimaw ahi.

Hattuum neitahte (property) etkol: Hattuum neitahte etkol khu apoimaw mama ahi. Sethei leh mangthei ahi a, hoitah a etkol angai mama ahi. Gam (land property) te khu document feltah siem in, gamgi bawlchien a chepte angai ahi. Gam lai (Land Settlement Certificate, etc.) te zong hoitah a kep apoimaw hi. Property chiemtena bu (Assets Register) nei a kum chin a suhchien (up-to-date) zel poimaw hi.

Record Bu chi tuom tuom kep : Hattuum ah recordbu tuom tuom maintain poimaw mama ahikia hi. Hattuum sungah sil poimawte theizingna ding leh mailam hun tanpha a poimaw zel ding te khu (1) Hattuum Min Gelna Bu (Innkuon chin a membrete min leh ahina uh chiemtena), (2) Nausen piengte chiemtena bu, (3) Mishi chiemtena bu, (4) Baptisma tangte chiemtena bu, (5) Kiteengte chiemtena bu, (6) Dansung a lahlutte bu, (7) Thunun leh lahlutte chiemtena bu, (8) Pemplut leh pemkhete chiemtena bu te ahi hi.

Tuolsung member kisimna (Local Statistic): Tualeh kumchin (Annually) in kisimna neizel ahiding a, ahun bihie nei ahoi hi. Etsahna ding in December 31. Tami in agennuom pen ahileh

tukum December 31 tan a kisimni a record pen Hattuum Committee in apom ding a, kum leh kum kikal ah kihenna tuom tuom um taleh zong akum kia December 31 ma tan (kum khat sung) tuami kisimna (Statistic Report) pen zah ahitou den ding hi.

THUKHUMSIN: Tam atung a igenkhawm te ukhu General Assembly leh PCI Danbupi in

Hattuum chinte kalsuonna ding zuiding abawl sil poimaw tahte ahi a, Dan leh Dun ahiding bangtah a zui ahilou chieng in kivaihawmna sawng te ah buoina nasatah apieng leng zel hi. Tuazieh in grass-root level ah panla tha chiet in Presbyterianism in atup digest in practical tah in hinpi ulei nasatah in ma isawn tou ngei ding uhi. Mangpan guol hingzawl chiet hen.

Deitelna (Hebrute 11:24)

*By:- Upa Thangzasuan
Vaal Veng.*

Ginna in Mousi in ahing pichin nua in Pharo tanu, tapa chia um ding a ut sih hi. Hun tomnou khat sung a khelna, nopna man sang in, Pasian mite toh bawlgentheina thuoh ding atelzaw tahi. Khrist min a thuohgimna khu Egypt gam hausat nate sang in angaithupi zaw hi, kipahman amu ding khu alam en zing zaw hi, Sawltah Paul in achi hi.

Thumapui: Mun tuomtuom a um Khirst min a ka unau ngaitahte aw, I Mangpa Jesu min ngai nou toh zana salam kahing pe masa hi, michin tahsapna kawm kal ah neh leh dawn a ibuai lai un, hun leh kumte aliem zel a, Khirst masate bang a hingtung thut ta mai hi, uni in Hattuum misiengthoute toh deitelna thupi zang in houlim ulei chi ka hi.

Puipa muonhuoi tanglai Mousi in Egypt lenggam hausatnate,

thupinate leh nopsahnate sang in Pasian mite Israelte toh gamdai gangaw mun a genthei thuoh ding a tel zaw dup mai hi, nang hilehchin koizaw natel diei? Pharo angsung a um ding ana tel zaw hileh anopsah ding dan kahing gen masa ding hi. Pharo in tapa bang a anei ahia, Egypt gam pilna leh siemna zousie a zil chaisah sieng ahi. Pharo tha heng ding zong ahi nalai hi. Tuahun lai a lengte thunei dan pen Pasian bang mai ahi uhi. Numei melhoi amu

uleh anu, apa kidong selou aji ding ua amat mai uh ahi. Ut lou chite um theilou hitop mai ahi, sil zousie ama uh deidan dan a abawl mai uh ahia, koiman aniel thei lou ding hitop mai ahi. Hinanleh zong tuapen damsung tomnou kum 70/80 sung a ding giep ahizieh in Mousi in hen la huoi asa sih hi. Tuaziehin Pasian mi Israel te toh genthei thuoh nan uleh kumtawn a hing ding ahi ziehin ana telzaw ta mai hi, Ama Mousi in gentheina athuoh zieh in, ami Isarel ten salpotna zalenna amu lou uh ahi, tuami tah khu silpoimaw va-ia mai ahi, tua mabang in I Mangpa Jesun gentheina simseng guollou athuoh ziehin eiten Pasian ta hina itan law ua, hundam in zong i na um nalai uhi. Tuaziehin gentheina thuoh ngam khu sil poimaw va-ia mai khu ahi.

Pa ten gentheina athuoh tam zou pou leh taten anopsahpi ding ahi, tuama bangin taten zong gentheina athuoh ngap pou leh pate nuomsa ding ahi zaw hi. Tuaziehin Sawltah Paul in Timothi kung ah Khrist galkap hoitah bang in genthei hing thuohpi in ana chi ahi. (2 Timothi 2:3) tuhun a nang leh ken gentheina ithuoh ngap sih leh inua aten nopsahna leh masawanna khantounate mu ngai lou ding ahi e guoi mi nuomsate tanchin sangin migentheite tanchin in mi

azouzaw hi, thamlou in akingai nuom zaw hi. Migenthei ten experience ahau ua thugen asiem uhi. Pasian manggam nasep ichipen thu nasem ahia, igensiem sih leh vang chu alawsam sa ihita mai hi.

Kumpi Solomon kung ah Mangpa Pasian in nadei penpen ngen in achi hi, Solomon in Mangpa aw kei naupang noukhat kahia, bangma theisiemna ka nei sih hi, tuaziehin nami Israelte lamdih a ka puitheina dingin pilna leh theisiemna hing pien achi leh Pasian alungdam mama mai a, aphul in aphul tamai hi. Aziehpén Ama mimal a ding ngen lou a, Pasian mi Israelte phattuumna ding anget zaw ziehin anget khahlou hausatnate thupinate leh minthanna apieh belap zungzung mai ahi. Tuaban ah apa bang a Pasian a ding a agin um leh masawtna pieh be nalai ding in, achiem nalai lai hi, Pasian vang lungkimna mama mai dan ahi. Eiten eima phattuumna ding maimai inget ziehun Uipi annkhamsa bangin hatla, koula in a um tahi, Mangpa Pasian in adei pen khu maw mite a ding a sem ding gim leh genthei thuoh ngap ding ahi. Tua hileh inget khah lou minthannate, toilawmnate, gensiemnate, damtheinate hingpe zungzung mai ding akhu aw.

Joseph hinkhuo ngaituo vawi Pharo nuoi ah dinmun sang tah mai aluo ahi, i eng mama mai uhi, hinan leh aute bawlgenthei huoi dante, a hasiet huoi dan ten hitui aluong nemsah mama mai hi. Genthei thuoh lou in nopsahna umthei lou ahimai hi. Amabou genthei thuoh lou a nuomsate pen ama 'Tui' loup i op Mengkeng bang ahia, ahing ken chiengin melma akou doh ahi, sil poitah vang ahi, ka unau ngaitahte aw Pasian thupen awi thoh sin len manthoh zaw in Pasian thu iman ding uh ahi.

Pasian pen izatat ding uh ahi, izabawl ding uh zong ahina lai hi. Laisiengthou in michin atung a vaihawmte thu thu in um hen aziehpén Pasian thu lou in koiman vai hawm a um ngai sih hi, Vaihawm a pangte khu Pasian guot ahi uhi. Tuaziehin koizong vaihawmte niel pouma Pasian lemguot niel ahi uhi. Tua bang a niel miten ama tung a thukhenna amu ding uhi, achi hi (Rom 13:1-2).

I gen nuom pen ahileh ideitelna uh toh Pasian bie ihi uhi. Koima paubawl a Pasian bie ihi sih uhi. Tuazieh a thupieh te zong iman ding uh ahi khu aw, Pasian min a vaihawmte leh inu leh ipa ngel zong khu Pasian min a izabawl ding uh ahi. Etsahna in Nungah khat ingai leh anu leh pa thu zong iman ding ahi, Esau in A u-zaw hina sang in ann kamkhat ana telzaw a, apa guoljawlna zong ana taan loh tahi. Agil kiel nan leh gentheina thuoh phot leh athawn a (amanbei a) aneh lel ding ahi. Gentheina thuoh ngap loute leh Pasian thupieh zui utlou ten Pasian maipha amu ngaisih ua, thuoh loulou ding athuoh law uhi.

Itawpna ding a ka gen ut khu gentheina thuoh ngapten guoljawlna in azou ding a, gentheina thuoh ngap lou ten lunggimna in azou ding uhi, tua ahileh nang koi zaw natel ut ei tukhu atel hun lai ahi. Pasian hepina phattuompi lou a na um lou na dingin Pasian min gentheipi in, simtu zousie Mangpa'n theisiemna hing peta hen, Amen.

GENTHEI THUOH CHIENG A “KHRIST” ETTON DING (I PET. 3:13-17)

*By:- Upa Khupsuankham
LDCC Hiangzou*

Thumapui: Gentheina zieh a kipahna hing tung ding pen ngaitua kawm a hin ding dan Peter in (Isai 50:9; 8:13) pansan in ahanthawn hi. Sil hoi bawl na ut uh leh ... (13) Peter in ngai un, koizong silhoi bawl utte koi in e siemmaw atansah ding? chih ahanthawn hi.

Na hampaha uhi (14) Mathew 5:10 ah dihtatna zieh a thuohte ahampha hi, Vangam ama ua ding ahi ziehin. Paul in tulai a thuohgimnate pen dachieng a eite athupina suhlat tehkahtham in kasep sih achi hi (Rom 8:15) Zausin un, Isai 8:2 isim leh Khrist a hinna nei ama toh tengkhawmte dingin, bangma sil zauhuoi a um sih hi, achi hi. Tulai Khristiante mai genthei thuoh hilou in ana peimasa Pasian mite suhgenthei in ana um hi.

Tang 15 ah thupi poimaw imu ahia, tuate khu:

1) Nouma a um kinepna koizong Khrist thu doh nahi uleh bangchi lai pou in siemtang a dawng dingin mansa'n um un.

2) Lungkham tah leh zaudan siem tah a dawng dingin Khristiante ang kidoh leh kiliensah leh ki thupisahna toh dawn ding ahi sih a, zaudan siemtah a dawn ding, tuamin mite lungsim ngaisutna ahip ding a Khrist lam a puilut thei ahi ding hi.

“Sie leh pha theina hoitah nei un”.. (10)

Peter in Khristiante ginna teptuohna lampi ni agen hi.

(1) Sie leh pha theina mi ama sie leh pha theina a bukim sih leh ahinna khu bangma ahi thei sih hi. Tuazieh in Khristian hinna ding a sil poimaw khu “Sie leh pha theina ahi”.

(2) Gamtat hoi Khrist zieh a gamtathoi hoitah nei khu a hinkhuo siengthouna apat in zatat ahuoi hi. Gamtathoi neilou ten “Ga” hoi anei sih ua, ahivang in gamtathoi neiten gahoi anei unei.

Pasian deilam ahi pou leh ... (17)

Peter in Khrist min zal a dihloou tah a athuoh uleh athua masa ding uh achia, gitlouna zieh a Jesu Khrist thuohna leh shina zieh a kumtawn hinna ahi. (Rome 6:10) Khrist kipiehna khu tu leh kumtawn adia khiel ngaidamna ahi (Heb. 7:27). Khristian thuohgimna (I Pet. 3:18-22).

Aziehpen Pasian kunga eite ahing ... (18)

Peter in tam laihah agel lai in Khristian te a gitlou zieh uh hilou in a ginna zieh in athuohlaw ua, tuaban a genthei te ahantawn hi.

- 1) Genthei thuohna lam a etton ding pen ‘Jesu’
- 2) Genthei thuohna lam a etton ding mai hilou in Vangam itun tanpa ana thuoh ding uhi.
- 3) Ama i ginna ziehin eiten Ama ah hansanna leh muonngamna inei uhi (Isai 53:11; Rom 5:1-2).
- 4) Mihing banga tahsa hinna khu aki that ahi (Rom 8:3; Eph. 2:14).

Tuate khu Nidang lai a ... (20)

“Tuate kichi khu Noah hun lai a thumang loute Pasian thumanglou te china. Jesu lei a alen lai a athugen sang loute genna zong ahi. Pasian in thuoh zou tah a angah lai in, Pasian mitmu mihoi khat e um a, “Noah” ahia, ama tuisang alet ding athei ziehin kuongsui ding thu ana tangkoup i hi. Noah in Gospel Campaign kuong sui chi khu “Pasian thugen” ahi.

Migiet (8) tui apat a hundam ahi:

Amaute khu Noah te innkuon ahia Noah leh aji, atate pasal 3 Shem, Ham leh Zaphet tualeh ajite uh 3 ahia, agawm in 8 ahi. “Tua hun etsahna in Baptisma (21) Peter

ngaidan in Baptisma khu Noah leh a innsung mite tuisang a hundam in Jesu Khrist min a Baptisma a ensah masa hi. Baptisma tungtang a ‘Peter’ in poimaw chia ana gente:-

- Baptisma khu lungsim/hinna susiengthou ahi.
- Baptisma tan khu theina chim **Pasian kung a ngetna.**
- Baptisma tang ding te’n in ka tang ding achi leh tansah ding ahi.
- Mangpa Jesu silbawl leh thawkiana zieh a hing um ahia, gitlounate sisan a hinna tha leh siengthou tah a umna ahi.

5) Khrist khu thalup in um nanleh shina a kipat athoukia a thuneina atang hi. “Suongkul a um hagaute kung ah Khantanhoi anagen hi” (19).

Suongkul a um koite e chi mi tamtah buoina ahia, ngaidan 3 um hi:

- 1) Ginglou na shisate genna...
- 2) Thuhunlui a misiengthou shisate
- 3) Vansaltah na puote (fallen Angels) mopaina thutawp vatangkoupite hi dinga gingta pawl Jesun bang e ava gen? tatna nasep azaw sieng thu vatangkoup i hiding chi ahi.
- 1) Hell/Meidil chi khu mishikhuo ahia, greek ham in ‘mutheilou’

china.

2) Sheol Thuhunlui lai a mishi khuo a ngai ahi.

3) Thuhuntha ah 'hell' thu ah ngaidan tampi aum hi.

- Mishite hagau umna mun a ngai pawl (Nas. 2:27-3)

- Siemlou tangte umna ding (Math. 18:9)

- Pawl khat in mishi khuo a um hagau te leh Vangsawltah hagau giloute kung a gen hiva achi uhi.

“Adih pen a genthei a um sih a,

thei dinga poimaw pen ahileh Jesu Khrist thuohna leh shina hagau mangthaite genna ahia, hundam tapou te'n Van khopi aluo ding uhi”

Jesu Khrist Van ah apeita (22)

“Peter in Khrist Van ah apeita a, Pasion zietlam ah siempu hi ding in a umta, tuachin Ama khu leitung a theina zousie leh thukhenna khu akhut a pieh ahita”. Mangpan athu guoljawlta hen.

GINGLOU MITE TOH KITENNA

Christian khat a ding in apoi diei?

~T. Zamkhankhual Zou

1. Thumapui:

Pasion gualzawl na ziehin ei Kuki Zo te leitung mun tuom tuom ah iki thethang sem sem ua tuachi in nidang sangin zong kitenna te zong huop lianzaw deu deu ta hi. Khenkhat in kami kasa chi sese lou in aki it kingaipi namdangte toh ki teng tua ua, pasal hi in numei hileh zong sahkhua kibahpi louh toh (lawki/milim bie mite toh) kitenna hing um zeuh zeuh ta hi. I mising toh te a gindan kibahpilou toh kiteng tamkhollou ahizieh a ngaisah a kinei khalou ahisihle mi ki it kingai a kiteng chi a buoipi khalou kihi maithei hi. Tuni in tabang a kitenna bangdia um thei adiei ahoi na diei, Bible in bang chi'n agen a tualeh ginna dang nei khenkhatte in bang e azuidan uh chite I en ding uhi.

2. Bang dinga ginglou mite toh kitenna um adiei?

A zieh tuom tuom hiding a gintat te ahile:

a) Ki itna zieh: Nungah leh tangval aki it zieh ua tambanga kitenna hing umthei, ki it kingai zong hi mawng mawnglou khat namdang/ gindandang zui mi toh kiteng chipen tawm ding hi.

b) Sum-le-pai zieh: Khopilien a kilohtawm a nna sem ahisihle siemzila um, inn lam a umte in sum poimaw uh, aman lah hakhat a ahalaw

khamzou ham ham atam aval a neilou ahizieha namdang/ginglou mi khat in a panpi khah leh awhden, azi/apasal lah hisamlou ahivanga aumna munah atheiloute mai a nupa chizong ana um thei tham hi.

c) Sepna kibah zieh: Sepna kibang, hun neidan kibang leh sepna toh kisai a hasat-nopsah dan kitheipi, azu-aham thuohkhawm ahizieha kingai a kiteng chizong um thei tham ding hi.

d) Ginglouni pen in mi a ngaisah zou zieh: Mi khenkhat piching mama, mi ngaisahsiem, kamsiem leh mi lungsim sui siem um a, hasat hun laitah a sum-le-pai, thale-zung mama a pang ahiziehua adeipen hikhollou ahiva kitenpi mai chi zong umthei hi.

e) Kithuhilna hoitah umlou zieh: Ginglou mite toh kiten leh kiten lou ding thu inn leh kholai ah theisaha ana um khalou poisahna zong ana nei lou amu mu kitenpi chizong umthei hi.

f) Azieh tuom tuom: Eimi sungah akituopi ding ama toh sepna kibahpi mulou chibang, innkuante tunga phuba lahna dan a ginglouni zi/pasal nei zong umthei a tualeh adang tuom tuom tamtah zong um ding hi.

3. Ahoi leh hoilouna a um diei?

Gindan tuom ahidungjui un

tawndan zong hing kigawm (mix) ta dinga tawndan tha lahna khat hing hiding hi. Mipil a dingin mi tawndan hoi umte lah lutna hoitah leh Christian gingu suosahna hithei hi. Mihausa tah mahpa/sungpa a neikhate'n hasat hun ah panpitu naipen leh muonhuoi zong ana hithei uhi. Hinanleh Pasian gingtalou namdang ham kibahpilou toh kitenna in kinaina sangin kigamlatna tun baizaw ding hi. Ham-le-pau kibahlou ziehin nu-le-pa a dingin mounu toh ahisihle mahpa toh kihou theilou a umthei ahia, tu-le-tate toh kigamlatna suoh thei hi.

Ginglouni toh numei khat akiten a ahile ama leh ama ahagau gotmun a kipekhia china bang ahia, anu leh apa in zong atanu hagau a itsih uh china himai hi. Pasal in zong tuabanga ginglou numei zi a anei a azi hagau dinmun a etkol zoulou a ahile numei igen toh a kikhietna aum sih hi. Tualeh a tate uzong Pasian gingu ahing hina ding sangun ginglou ahing hina dinguh bailam zosem hi. Innkuon a kipahtah a maitam bolkhawm chi um theilou ding hi. Bible in Christian innkuon agendan lah Pasal in azi a it dingdan khu Khristian in hattuom a it a ataang ua akipieh bang ding chi, zite Mangpa kunga akitulut bangua

kitulut ding chi, tate kungah Mangpa ah nu-le-pa thu mang ding chi. Mi zousie gingtu hiding dei china ahi.

4. Bible in Gingloulumite toh kitenna bang chi in agen ei?

Bible in ginglou mite (lawki bete) toh kitenna ana zada mama a, mun tamtah ah aphallou thu chientahin ana gen hi. Pasian biehn a apat pielmang louna dinga kikepna/ dai kikai khumna hoipen khu amaute toh zi/pasal a kineitua lou ding ana chi hi (Pawtdohna 34:12-16; Danpiehnina 7:3-4). Ezra ah zong lawki pasien bie namdangte toh kiten pollou ding thu ana pie hi (Ezra 9:11-12). ‘Ana kiteng pol tei tei ukhu Pasian tunga a gitloutatna nasep u ahi’ chi in Jehiel tapa Shekamiah in Siempu Ezra kungah ngaidam ana ngen hial hi (Ezra 10:2-3). Sawltah Paul in “numei (meithai) khat in pasal anei dinga ahile Mangpa aum mi (piengtha) adei khat pou pou kitenpi heh” (1Korinth 7:39) chi a tualeh “ginglou mite toh hahkol puohkhawm theih ahisih” ana chi hi. (2 Korinth 7:39).

Ahile Bible in “‘Ginna, kinepna leh itna a umden a, hinanleh tamteng laha alien pen itna ahi’ (1 Korinth 13:13) achi vele kou ka ki it pou ule bang apoina aum ei?” achi thei ahi. Hinanleh Johan 3:16 ah “Aziehpen

Pasian in khovel a it sengsenga, tuachi’n a tapa tangkhat neisun apie hi, koipou Ama gingta in amanthat lou a kumtawn hinna anei zawhna dingin” tualeh Ngai un, Pa hing itna thupi hina va-ia e, Pasian tate chia i um taah uh. Tuaziehin leitungin ahing thei sih hi, Ama atheilou zieh in. (1 Johan 3:1).

5. Sakhuo dangte in ginna dang toh kiten bangchi’n angai uoi?

Sakhuo chi 2 Hindu leh Muslim sakhuo I en ding uhi.

Hindu: Tami sakhuo zuite tawndan ah kitenna khu Hindu Marriage Act (HMA) zui ahishile pomlou uhi. A kiten chiengun asiempu un siempi thutengte gen in tuachi’n mei kitokuong khu 7vei kimvel in nupate pei ua tuami khu Saptpadi (seven steps) chi uhi. Tami 7vei kimvel a apei ukhu poimaw mama a, tuami a zaw masangsie uh kitenna khu kitenna tah tah in kisimlou hi. A hagau tanna masa uh chimai vai maw. Tualeh eite in Pastor mai a kitenna inei chiengun zungbu iki butсах ua ‘ei tegel pumkhat ihita a tami zungbu amongbei ahibangin ikitenna zong mong bei ta hen.’ chidan bangin hindu pasal in azi lu ah rong nu a tuami ahile ‘Sindoor’ kichi hi. Tami in a etsah ahile ‘kazi na hita, nupa hina ah

kipezou ding leh siangthou dingin' china bang ahia pasiennu parvati umpina atanna ding chidan ahi. A kiten uapat setan hagau parvati pasiennu leh pasien dang dangte kunga kipiehkhieta hita hi.

Muslim: Muslim sakhuo zuite tawndan dungjui in Muslim numei khat in sakhuo dang zui pasal him him akitenpi theilou ding chi ahia, pasalte in ahile nam khenkhat kitenpi thei ding in phalsah in um uhi. A sakhuo laibu uh, quran a Surah Al-Ma'idah 5:5 in a laibu ua tuang namte asiengthou nalai numeite chipen Christian leh Jews numeite kitenpi thei dingin phalna pie hi. "This day [all] good foods have been made lawful... and [lawful in marriage are] chaste women from among the believers and chaste women from among those who were given the Scripture before you". Tamna alaibu ua tuang kichi khu Ahl al-Kitab agenna ahia, tuanah Jews leh Christiante thu ana tuong kha hi.

Surah Al-Baqarah 2:221 in Muslim numei in sakhuo dang zui pasal akitenpi khaam hi. A pasal dingte in Muslim sakhuo ahing zui masang un na numeite uh ginglou pasalte toh kiteng dingin pekhe sih un. Tambang a kitenna in 'meidil a chiel/naisah hi'. "And do

not give your women in marriage to polytheist men until they believe it". It emphasizes that a believing slave is better than a free polytheist, as the latter "invites to fire". Muslim numei Christian/Hindu sakhuo zui toh kiteng um teuh lou hi.

I tenkhawmpi Hindu-te leh Muslim-te in amau sakhuo a ngaisah dan uh imu thei a, sakhuo a hoitah a kipe masalou in sakhuo dang toh kitenna phallou ahidan uh kimu hi. West Bengal state Alipurduar district sung Totopara khuo ah singtangmi nam chituom mama Toto kichite teng ua, amaudan in namdang toh kiten phal hilou hi. Pasal/numei namdang toh kiteng aumleh nawsuo zel uhi. Tualeh Darjeeling a Terai leh Nepal a Terai a teng Rajbangshi mite in zong tuabang dandeu tawndan ana nei uhi.

6. Sakhuo kigawmkhawm a kitenna leh tenkhawmna:

Kitenna khenkhat 2 (nivei) kiteng um valong uhi. 2vei kiteng chipen a numeite sakhuo dan a kiteng uh tuamabanga apasal sakhuo zui a zong kiteng kia china ahi. Mou la dingte in huoplien kisa a tuachia kitenna a bawl uh hivan hinanleh sil kilawmlou leh zui hetlou ding sil ahi hi. Tabang kitenna/mouhahna

innsunga akiphal a ahile sakhuo ni (2) tengkhawm phal china himai hi. Tabang ah khun bangchi'n Christian innkuon siemkhiet thei ahi diei? Hasat gentheih hun ah kikipkhawm khu sil hamsatah suoh dinga, sakhuo ziehin kisel leh kinah umthei ding hi. A tate un Mangpa min suong kawm in nu-le-pa thu azui thei ding uh gintat huoi lou hi.

7. Nidang a ipupa te tawndan:

Kitenna khu ipu-le-pate in ana poimawngai pen uh chi thei ding in ana um hi. Nu-le-pate in tate koppi ding hoitah in en masa zel ua, kau nei leh kau neilou nasatah in khen ua tualeh akhanggui uh bang chibang, damthei-damtheilou, misie-mipha chite ana en chien mama uhi. Tuazieh ma in khuo gamlapi a meltheilou toh kiteng ding ana phal khollou uhi.

8. Bangchi panlah ding?

Atunga ina kikip kitenna umna zieh te apat in panlah dingdan zong ithei thei ding uhi.

a) Ahuntah a thuhilna hoitah kipieh ding: Tami ding in innkuon, hattuom leh khotang in panlah ding kinei hi. A khangtou pante leh khanglaite lah ah Gingtu khat a dinga Pasian thu jui apoimaw dan leh Bible in agente hoitah a thuhil ding poimaw hi. Pasian in

Israel tate kungah thupiehte khu mun zousie leh banghun pou ah zong na hilding uh ahi ana chi hi. Danpiehnina 11:18-19 Tuaziehin tam ka thute na lungtang u'leh, na hinna uah na koi ding ua, chiemtena ding in na khut uah naviel ding ua, na mit kaal uah talgahna bang in na nei ding uhi. Tamte khu na tate uh na hil ding ua, na inn ua na tou chieng un, lampi a na pei chieng un, tualeh na thaw chieng bang un, na gen zel ding uhi. Innkuon, hattuom leh khotang in panlah ding mawpuohna kinei chiet hi.

b) Ginna dai kikai khum ding: Piengtha khanglai nungah/tangval khat ihile Pasian kunga hoitah a kilat a, nungah/tangval ngaih ding zong tel siem ding ahi. Thupil in 'Mei am toh kimawl sin' achi hi. Tuaziehin gingtu khat khu ginna hagau dai kikai khum ding poimaw hi.

c) Tate koppi ding zong piching tah a kikippi ding ahi: Tate koppi ding suina ah kikip khawm a hoi isahpi leh hoi sahpi lou zong hoitah a genkhawm dial dial poimaw hi. Tuabanga kikip khawmna a umtheina ding in nu-le-pa zong akihon uh poimaw hi.

d) Khanglaite adieha mundanga umte in lawm-le-gual a telsiem uh poimaw hi. A lawm lunglutna

bang, bang thu a gen mun ei, bangthu ahing kikuppi ei (?) chite et ngai hi.

e) Genthei kisah seng zieha nopsah theina ding/innkuonte in themkhat sum-le-pai a nop asah khah uleh chi a gingloui mihausa kitenpi hetlou ding ahi. Leitung a tomkhat nopsah a kumtawn gawtmun hing puilut thei ding mi toh umkhawm sawmlou ding ahi.

9. Thuzawna : Tulai a kigen zel khat- Nidanglai in kitenna bailam in kikhen hamsa; Tulai in kitenna bailou, kikhen bailam' kichi hi. Khristian innsunga khanglien, hattuum phatna lapawl zilna a pang zing mundang a umzieh/ alemtang zieh a gingloui toh kiteng chipen ginna det neilou zieh ahi. Anu leh apan aphal pieh a, amau aki it akingai pou ule chi ding hilou hi. Ki itna poimaw ma, kitheisiemna poimaw tham, tuami sangin innsunga Jesu Khrist ahing um masat poimaw sem hi. I Mangpa Jesu Khrist in “Pasal in


anu leh apa anuasie dinga azi atu ding hi, tuachi'n ani un sapumkhat ahing hita ding uhi” (Mathiu 19:5) chi ithei chiet lai un “Tam mi neute laha khat apuasah sangin angawng ah bu hehna suongsum awsahtuipungah kipailut leh ama a dingin ahoizaw ding hi” (Luk 17:2) chi khu manghil sih vai.

Source: Should Christians marry non-Christians? Is it advisable for Christians to marry non-Christians? https://biblehub.com/q/should_christians_marry_non-christians.htm

The Meches and the Totos of North Bengal pp38 author Charu Chandra Sanyal published by The North Bengal University in 1973
Zou Holy Bible
Google/AI
YouTube

(Laigelh toh kisai ngaidan nakup utleh tkhualzou@gmail.com ah aw)

ZPYF Stage Project



ZPYF Column

1. 70th General Conference Host ding Unit vena nei.

Zou Presbyterian Youth Fellowship Central Committee thupha sah na bang tah in, date - 19th April, 2026 ni in ZPYF Office Bearer teng in 70th General Conference Host ding Unit **P. Salem** vena vanei hi. District leh Host unit tetoh suun hun biapieh na nei ahi a, Asst. Leader leh Asst. Secy in puitu hi na la in, i/c Youth in Hagau angkuang luina nei in nuamtah in nei khom ahi. Suun nua biapiehna zou in District Lamkai, District PYF leh Host Unit LCC, PYF te toh ahing tung ding 70th General Conference pan lah khom ding dan te kihou khom na nei in, tualeh hall mun ding leh camp mun ding te et khiat na zong nei suah ngal ahi. 70th General Conference law ching tah a zah ahithei na ding in ithum na ua thei chiat va ui.

2. Apeisa PCI Biennial General Assembly leh Centenary Jubilee Celebration, 2026 a ZPYF apat deligate khat ahing nget na bang un ZPYF Deligate ding in Pro. Pastor S. Mangminlun ana kisawl hi.

3. ZPYF STAGE PROJECT

ZPYF in stage platform project inei uh ahia stage khu aneng neng a bailam tah a zawpthei ding tualeh bailam tah a phel khiat thei ding a bawl ahi. ilung tup bang tah a bawl khiat thei ahi leh ZPYF ading a source of income hoitah hing hi thei ding hi. ahing tung ding Jan 28, 2027 ZPYF General Conference masang ngei a bawl zou ding a a lam et ahi.

Stage pumpi adung avai 20x78 feet a lian ding a bawl ahi. asan dan(height) side stage tel gel khu feet 3 a sang ahi ding a, main stage feet 5 tualeh musician stage khu feet 6 a sang ahi ding hi. Avideo imu a imu mabang un plywood size 4x6 feet dungzui a aframe bawl ahi(ateng, azawl, atemna, akeng adjust na ding nut leh bolt). Tam aframe te khu aneng neng a phelkhiat thei ding a bawl ahi.

Frame khat bawl na a - Plywood man, sia(iron) man, nut & Bolt man, wielding man tualeh rong(colour) man agawm in Rs. 10,000/- alut hi. Tami asum lutz at khu sample frame 5 bawl ahia tuami a pat asum lut zat tuat ahi. Aplatform a ngiamzaw asangzaw um nanleh asum lut dan kikhe seng lou ahi man in atangpi (average) lah ahi.

Youth Co-Ordinator
Contact : 7085981793
Gpay : 7085981793

PATRON MEMBER-TE

001. Upa Gouzamang	002. Pu Hav. Khamchinkhup	003. Pu Khamzalam	004. Pu Chinzasuan
005. (L) Upa Liansuanpau	006. Pu Khamchinthang	007. Pu S. Dalhang	008. Upa Kapkhanthang
009. (L) Upa Langginmang	010. Upa S. Nangkhanlal	011. Pu S. Lamkhotang	012. Upa Dr. M. Lachinkhai
013. Upa Khamchinjam	014. (L) Upa D.K.Manlun	015. Upa Suankhanmang	016. (L) Upa Khupgou
017. (L) Upa Chinkham	018. Upa Ngulchinkham	019. (L) Rev. V. Vungzalian	020. (L) Rev. Kamkhosoi
021. Rev. Tualzachin	022. Rev. H. Nengzaton	023. Rev. Awnkhankhup	024. Rev. Dr. Hangpi Manlun Zou
025. (L) Pu Tuanzapau	026. (L) Rev. Ginchinjam	027. (L) Rev. Khamzasuan	028. Upa T. Lamkhotawng
029. Upa Khaichinmang	030. Rev. Stephen Chinzathang	031. Pu Khupkhanmang	032. Pu Khaidohlian
033. (L) Hav. Khamzahang	034. Pi Vungzanuam	035. Pu T. Gouzadou	036. Upa Liensuonkap
037. Pi Zekhochiin	038. Pi Hatkhanvung	039. (L) Pi Ngaihoiching	040. Pi Mankhannieng
041. Pu Goukhanmang	042. Pi Chingzalam	043. Pu S. Thianzakhai	044. Pi Kamkhanching
045. Pu Haukhanpau	046. Pu Tuallianmang	047. (L) Pu Dongkap	048. (L) Pi Chingkhanmang
049. Pi Donkhonian	050. Upa Henzakhup	051. (L) Pu Saichinpau	052. Pu Goumang
053. (L) Upa Khamkhanhang	054. Shie Laangkhanlal	055. Upa Khamkhanlun	056. Upa L. Tualkhanpau
057. Upa Jamsianmung	058. Upa Ginzadong	059. (L) Upa Kaizathang	060. Pi Goizanuom
061. (L) Pi Thangneivah	062. Pu Khamzathang	063. Pi Donchin	064. Upa Liankhanmang
065. Pu Hauchinlun	066. Upa T. Thangsuanlal	067. Pi Goichiin	068. (L) Pu T. Khupchinthang
069. Upa T. Kaizalam	070. Pu Paul Henkholal	071. (L) Pu Soikham	072. (L) Rev. P.C. Manga
073. Rev. Khamchinkhai	074. Rev. Zamlianpau	075. Rev. Chinzapau	076. (L) Rev. Kamkhozam
077. (L) Upa Chinpu	078. Pu Zamkhanthang	079. Pu Chinglen	080. Miss Chinhaunieng
081. Upa P. K. Sawia	082. Pu Goujakhai	083. Pi Niangkhanmang	084. (L) Evan. G.L. Joshya
085. Pi S. Chingkhanmang	086. (L) Pu Vumchinkhup	087. Upa Khaihenthang	088. Upa T. C. Pau
089. Upa Nengchinkap	090. (L) Upa Jamkhongam	091. Upa HT Manga	092. Nu Vahkhohling
093. (L) Upa S. Hauliankap	094. Pi Chinnu	095. (L) Upa Ngulzakhai	096. (L) Upa T. Gougin
097. Pu Ginsuanhau	098. (L) Upa Langminthang	099. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thatang Taihul	104. Pu Kamkhankap
105. Bhim Prasad Ghatani	106. Rev. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. (L) Rev. Mangsuanthang	115. (L) Pu Lamchinhou	116. Upa Pauchinlei
117. Nu Kimneihei	118. (L) Upa Kamgenpau	119. Nu Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. (L) Upa Lunchinthang
129. Pu P. Tongthang Zou	130. Pu H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munlao	134. Pu Sianzakhai	135. Upa Thanggingsuan	136. Pu Kapminlun
137. Pi Tingzavah	138. Dr. M. Limlunthang Zou	139. Rev. Hauzalian Manlun	140. Rev. Suangliankap
141. Rev. Ginlianmang	142. Upa L. Mangminthang Zou	143. Upa Goukhanthang	144. M. Thangsuansang Zou
145. Upa T. Kamchinthang	146. Pa Ngamsei	147. Rev. M. Gouginsang	

LIFE MEMBER-TE

001. (L) Upa T. Khupkhenpau	002. (L) Pu M. Ginzahau	003. (L) Pu Selzapau	004. Pu L.C. Pautungnung
005. (L) Pi Khamkhannieng	006. Pi Ngainuam	007. Upa Chinsuanthang	008. Upa Shanti Kumar
009. Pu Kamkohau	010. (L) Pu Khamkohau	011. Upa Khamzathang	012. Upa Chinkhanthang
013. (L) Pu Tongzathang	014. Pi Chiinneilam	015. Upa Kulthang	016. H/Sm. Upa Kaichinpau
017. Pi Niangzalam	018. Upa P. Doukholun	019. Pu Kapminlian	020. Upa P. Nehgin



Undelivered

Please return to:

The Editor

KHIRSTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a.
